

La Quotidiana 10-2-2015, p.2

## L'euro, tema era tar il pled d'avertura

■ (anr/fa) Las consequenzas da l'euro flaivel èn stadas en il center dal pled d'avertura dal president dal cussegl grond Duri Campell. El sustegna il giasch da reducir ils obstachels birocratics per daventar pli effizient. Ch'ils attentats terroristics a Paris l'hajan schocà e consternà fermamain, ha ditg *Duri Campell*, «questa attatga sin nossas valurs democraticas fundamentalas mussan quant svelt ed imprevisiblamain che l'agenda politica po vegnir dictada.» Ins stoppia constatar ch'ins nun haja «era tar nus betg» naginas garantias da segirezza, ni globalas, ni naziunalas, ni regionalas. A chaschun da ses «sguard sin l'onn che stat avant nus» ha il president dal parlament grischun manegià che l'onn nov na vegnia betg ad esser facil per il Grischun. In motiv essenzial èn tenor el las turbulenzas cun la valuta euro: I vegnia ad esser pervi dal franc ferm cleramain pli difficil d'exportar products svizzers e d'attrair turists europeics. «Per l'economia d'export dovri partenaris socials ch'èn pronts da discurrer e tschertgar soluziuns in cun l'auter», ha ditg Campell. Da las persunas responsablas per il turissem spetga el «ch'ellas tuttas tirian vi da la medema suga – e quai en la medema direcziun.»

E per il parlament èsi tenor el impurtant che la lavur vi da la lescha davart il svilup economic s'avanzia svelt. I saja interessant ch'i vegnia uss adina puspè pretais da la politica meglras cundiziuns da basa, senza ch'ins sappia precis tge che quai veglia dir, ha agiunt Duri Campell: «Sch'ins manegia cun quai da reducir ils obstachels birocratics, poss er jau sustegnair questa posiziun.»